

KENYATAAN MEDIA



KEMENTERIAN PERDAGANGAN DALAM NEGERI DAN HAL EHWAL PENGGUNA
No. 13 Persiaran Perdana, Presint 2,
62623 Putrajaya
No. Telefon : 03-8882 5562
No. Fax : 03-8882 5569

PELANCARAN PROGRAM CYBER COPYRIGHT ENFORCEMENT (CyCORE)

Putrajaya, 6 Januari 2022 - Kementerian Perdagangan Dalam Negeri dan Hal Ehwal Pengguna (KPDNHEP) melalui Bahagian Penguat Kuasa telah mewujudkan satu program iaitu Program *Cyber Copyright Enforcement* (CyCORE) bagi membanteras jenayah pelanggaran hak cipta filem digital atau cetak rompak filem digital secara dalam medium internet.

2. Program CyCORE merupakan satu kaedah terancang yang dikhususkan untuk penerbit-penerbit filem tempatan atau pemilik-pemilik hak cipta filem tempatan agar dapat bekerjasama dengan lebih daripada **50** rakan-rakan strategik yang terdiri daripada agensi kerajaan, platform e-dagang dan Penyedia Perkhidmatan Internet (*Internet Service Provider-ISP*) yang diselaraskan oleh pihak Kementerian dalam satu platform bagi mencegah kegiatan cetak rompak filem digital dalam talian.

3. Program ini dilaksanakan melalui kaedah tindakan sekatan laman sesawang (*website blocking*) dan penurunan kandungan (*content removal*) yang menjadi kaedah yang paling pantas dan berkesan dalam melumpuhkan aktiviti pengedaran cetak rompak filem digital dengan kerjasama rakan-rakan strategik tanpa melibatkan institusi Kehakiman. Melalui program ini, sasaran tindakan sekatan laman web atau penurunan

kandungan adalah dalam tempoh **48 jam** dari pemakluman oleh pemilik hak cipta filem tempatan yang menyertai program ini kepada Kementerian.

4. Terdapat tiga (3) objektif utama program ini iaitu:

- a. mewujudkan satu platform kerjasama di antara Kementerian dan rakan strategik dengan pemilik hak cipta dalam membanteras pengedaran cetak rompak digital dalam medium internet;
- b. membantu mengurangkan kerugian yang dialami oleh pemilik hak cipta semasa pelancaran filem baru dalam bentuk digital; dan
- c. meningkatkan pemahaman serta peranan pemilik hak cipta dalam usaha membanteras cetak rompak digital

5. Skop pemakaian bagi kelayakan menyertai Program CyCORE ini dilaksanakan berdasarkan tiga (3) kriteria iaitu:

- a. pemilik karya filem tempatan atau usahasama (tempatan dan luar negara) sahaja;
- b. pertama kali dilancarkan dalam medium internet seperti platform *Over The Top* (OTT) atau seumpamanya; dan
- c. jangka masa pemantauan secara intensif adalah untuk tempoh **14 hari** berturut-turut yang ditentukan oleh pemilik hak cipta

6. Program CyCORE ini telah melalui beberapa siri pengujian bersama pemilik hak cipta filem dan mendapat sokongan serta maklumbalas yang positif dalam pelaksanaan program ini di mana ianya adalah berkesan untuk dilakukan serta dapat mencapai objektif yang ditetapkan. Hasil dari siri pengujian ke atas **lima belas (15)** filem yang telah menyertai program ini

mendapati sebanyak **298** laman sesawang telah disekat dan sebanyak **1,418** penurunan kandungan telah berjaya dilaksanakan sejak tahun 2021.

7. Di samping itu, melalui program ini pemilik hak cipta diberi tunjuk ajar dan pemahaman berhubung peranan mereka untuk membuat pengaduan sendiri dengan melaporkan terus pelanggaran hak cipta filem mereka kepada platform media sosial atau platform e-dagang seperti Facebook, Instagram, Youtube, Telegram, Lazada dan Shopee yang menyiarkan atau menjual karya filem mereka tanpa kebenaran di platform berkenaan. Ini kerana platform e-dagang dan media sosial ini mempunyai Polisi Harta Intelek masing-masing yang akan sentiasa bekerjasama dan membantu pemilik hak cipta dalam menurunkan mana-mana kandungan yang melanggar hak harta intelek.

8. Selain itu, pihak Kementerian juga melaksanakan profiling jenayah kepada mana-mana pihak yang disyaki secara aktif melakukan kesalahan pengedaran cetak rompak filem digital di bawah peruntukan Akta Hak Cipta 1987 agar tindakan yang lebih tegas dapat diambil ke atas mereka yang terlibat. Mana-mana pihak yang didapati bersalah boleh didenda tidak kurang daripada RM 2,000.00 dan tidak lebih daripada RM 20,000.00 bagi setiap salinan langgaran, atau penjara suatu tempoh tidak melebihi 5 tahun atau kedua-duanya.

9. Sehubungan dengan itu, dengan adanya Program *Cyber Copyright Enforcement* atau CyCORE ini, pihak Kementerian berharap agar penerbit-penerbit filem tempatan atau pemilik hak cipta filem tempatan mengambil peluang dengan menyertai program ini apabila mereka berhasrat menayangkan filem-filem mereka secara digital melalui medium internet

buat pertama kali bagi membolehkan pihak Kementerian bersama-sama rakan strategik yang lain dapat bersama-sama pemilik hak cipta filem bertindak secara bersepadu dalam melindungi hak harta intelek mereka daripada dieksploitasi secara haram yang akan merugikan pemilik karya filem tersebut.

10. Mana-mana pihak yang memerlukan maklumat lanjut berhubung program ini atau ingin menyertai program ini bolehlah menghubungi **Unit Hak Cipta dan Cakera Optik, Bahagian Penguat Kuasa** di talian **03-8882 6157** atau melalui e-mel **cycore@kpdnhep.gov.my**.

###

**Kementerian Perdagangan Dalam Negeri
dan Hal Ehwal Pengguna
6 Januari 2022**

LATAR BELAKANG

Kementerian Perdagangan Dalam Negeri dan Hal Ehwal Pengguna (KPDNHEP) telah ditubuhkan pada 27 Oktober 1990. Matlamat penubuhan Kementerian adalah untuk menggalakkan pembangunan perdagangan dalam negeri yang berdaya maju, berdaya saing, dan berdaya mampan, khususnya di dalam sektor perdagangan pengedaran.

Sektor perdagangan pengedaran adalah antara penyumbang utama KDNK negara dan ia bertindak sebagai benteng kestabilan ekonomi, terutama semasa situasi ekonomi luaran berada di dalam keadaan ketidaktentuan. Perdagangan pengedaran perlu kukuh bagi menampun sebarang ketidakstabilan dalam ekonomi negara.

Dalam masa yang sama, Kementerian juga komited dalam melindungi kepentingan dan hak-hak pengguna. Ini termasuk membangunkan ekosistem pengguna dan peniaga yang bersifat melengkapi dan ke arah *self-regulated*, seiring dengan aspirasi ke arah masyarakat negara maju. Ia diharapkan akan melahirkan pengguna dan peniaga yang matang dan beretika dalam berurusniaga, dan hasilnya adalah negara yang seimbang dari segi ekonomi dan sosial.

Agensi di bawah KPDNHEP:

